

Vigeli Berther, Sedrun/Camischolas
CR 1989, pag. 415



Ils 14 d'october 1987 ha il Tutpuissent clamau siu fideivel survient Vigeli Berther. Gest quei di vess el giu la cuida ed il plascher da festivar siu 65avel di da natalezi. Mo quei ha buca duiu esser. Entgin temps avon era el vegnius taccaus d'ina maligna malsogna che ha plaun a plaun consumau las forzas d'ina natira da fier. Il defunct ha surportau las dolurs e la tortura cun pazienzia e grondezia humana.

Ils 17 d'october 1987 ha in imposant conduct da bara accumpignau president e deputau Vigeli Berther al davos ruaus sil santeri da sogn Vigeli a Sedrun. La cuntrada ei sclarida e sepresenta ella pumpa digl artist atun. Ei ha vuliu esser aschia per ch'il cumiau da scolast secundar e president communal sepassi avon ils egls da tut la Val Tujetsch. Il Chor da baselgia ha embelliu las funcziuns funeralas e documentau cheutras tgei stema ch'il defunct gudeva en sia val. Igl ei stau in beinmeritau Dieus paghi per tut il bien ch'il defunct ha prestau duront dis ed onns per la scola secundara, per sia vischnaunca e per il Cumin.

Sur Giusep Cathomas, il plevon da Sedrun, accumpignaus da plirs confrars, celebrescha in edificont survetsch divin. Sco adina anfla el plaidi beinfundai per skizzar la veta e l'activitat dil defunct sco persuna da buontad ed attaschadedad per sia famiglia e per l'entira cuminanza. President communal Gion Beer presenta las activitads dil defunct Vigeli Berther sco president communal e deputau. Ils numerus representants dallas autoritads politicas communalas, circuitalas e cantunalas demuossan ch'il defunct fuva stimaus e respectaus tier ses anteriurs collaboraturs e superiurs. Ils dus davos onns ha el - muort sia malsogna - remess in uffeci suenter l'auter. President communal Gion Beer menziunescha ch'il defunct seigi buca adina staus in emperneivel partenari. Mo el tonscha il maun da pasch al preziau e stimaui convischin defunct engraziond per tuts survetschs prestai alla vischnaunca ed al cuminetel.

Derivonza ni origin

Vigeli Berther ei naschius ils 14 d'october 1922 a Camischolas sper la caplutta da sontg'Onna sco 10avel affon da vegl mistral Vigeli Berther-Flury. Ensemens cun ses 11 fargliuns crescha el si en ina famiglia cristiana. En ina tala truscha ha il defunct stuiu emprender ad uras da sedustar e sefar vitier. Las scolas primaras ha el frequentau a Sedrun e la scola secundara all'«universitat» a Camischolas. La casa da scola per la scola secundara sesanflava lu a Camischolas per survir meglier all'entira val. Duront las liungas vacanzas vev'ei num far il fagot ed ir en plaza per luvrar e gudignar. Mo era duront il temps da scola veva mintga affon siu ressort da lavur. Ei tuccava da perver las nuorsas ni las cauras ni era fender e purtar lenna. La liscentadad era - tenor meini dils geniturs - la fontauna dils vezis. Igl onn 1938 anflein nus Vigeli Berther sco practicant ella scola purila al «Plantahof». Quei contact cullas differentas lavurs d'agricultura ha svegliau senn e capientscha per ils basegns dil puresser ed el ha pli tard defendiu cun fervur ils interess dils purs. En in marighel da 12 affons san buca tuts far il pur, e perquei serenda il talentau giuven el seminari da scolasts a Cuera ch'el terminescha igl onn 1944 cun la patenta da scolast primar en sac. Scolasts dev'ei da gliez temps la fuortga pleina ed el ei staus leds sco in'olma d'astgar supreender la scola cumplessiva da Selva 1944/1945 ed igl onn 1945/46 la scola cumplessiva da Cavorgia. Tenor ina lescha naturala stuevan ils giuvens scolasts smuttar lur corna ella periferia dalla vischnaunca. Mo quei ei nuota stau donn da viver empau ell'isolaziun, viver el prighel e sentir ils disavantatgs digl abandon per endriescher tgei che basegna.

Suenter dus onns da practica en scola primara serenda Vigeli Berther a Friburg e daventa scolast secundar. 1947-1949 instruescha el ils scolars dalla scola secundara a Lumbrein. Igl onn 1949 daventa el scolast secundar a Tujetsch. Dapi lu magistrescha Vigeli Berther en sia vischnaunca burgheisa, gl'emprem a Camischolas, lu a Rueras e dapi 1962 ella nieveregida casa da scola a Sedrun. Duront la stad 1947 frequenta el in semester all'universitat da Perugia. Perquei dominava il defunct Vigeli fetg bein il lungatg da Dante. Silsuenter serenda el duront duas stads a Paris per seprofundar el lungatg

franzos. Quellas dimoras egl exteriur han aviert igl egl per dimensiuns e relaziuns pli vastas. Igl onn 1956 siara Vigeli Berther la ligia per la veta culla giuvna Tresa Jacomet, feglia da vegl president communal Placi Jacomet. Lur letg vegrn benedida cun treis fegls. Ils premurai geniturs procuran che scadin sappi sescolar ni absolver in emprendissadi. En quei ravugl famigliar ha il defunct adina puspei cattau la forza ed il sustegn necessari per sia viva lavur publica.

Scolast secundar ed um da cultura

40 onns ha il defunct instruui e formau giuvens carstgauns. Sia instrucziun era - sche zaco pusseivel - adina cumbinada cun la veta pratica. Aschia cattav'ins savens scolast secundar Vigeli a mesirond praus, buoras ni il volumen dallas fontaunas el vitg. Bandunond la scola, stuevan ses scolars era enconuscher enzacons tozzels da nossas flurs alpinas. Las lecziuns preferidas dil defunct eran las uras da zambergiar culs buobs. Cheu capeva il defunct d'influenzar ses scolars per las bellezas manualas. Jeu crei, ch'el enconuschevi tuttas specias da lenn. Entagliar e dulitgar scaffas e scaffettas, truccas e truchets, uoppens ed uras eran in hob, ina pissiun. Cheu veva il Tutpussent regalau al defunct in dun special. Sper la scola ha Vigeli Berther era contribuiu sia part a nossas cuminonzas culturalas. Aschia eis el commember d'honur dil Chor baselgia ed in fideivel commember dalla Societad da musica.

En survetsch dalla cuminanza

Duront onns e decennis ei Vigeli Berther s'occupaus intensivamein cun ils fatgs publics. Quasi parallel cun sia veta privata e professiunala va sia activitat publica. Sco scolast sesenta el obligaus da dar niev impuls alla veta culturala, sociala ed economica. Jeu crei, ch'jeu sbagli buc, sch'jeu ditgel che la politica hagi fatschentau il defunct ton sco sia veta professiunala. 1971 daventa Vigeli Berther president communal. Cun tschaffen e perschuasiun surpren el il guvernagl dalla vischnaunca da Tujetsch. Diesch onns ha el giu e teniu il guvernagl cun maun franc. Sia mira principala ei stada: la protecziun digl ambient ed il manteniment e la tgira da nossa biala Val Tujetsch. Tenor il cudisch «Tujetsch», cumparius 1987, stat il defunct botta, naturalmein cun ses consuprastonts, per las suandontas decisiuns:

- ina nova constituziun communal
- separaziun dalla vischnaunca politica da quella dalla pleiv
- prolungaziun dil temps da scola sin 40 jamnas
- Tujetsch daventa commember cumplein dalla Corporaziun da vischnauncas Surselva
- la pladida d'in miedi stabel en Tujetsch
- erecziun dall'ovra electrica Val Giuv
- canalisaziun generala e serenera
- vias pils uclauns: Selva e Maunsut (Surrein e Cavorgia)
- Tgesa communalala e localitads da schurmetg a Sedrun
- cumpra d'ina casa pil museum da Tujetsch, numnaus la «Truaisch».

Alla fin da sia activitat politica sin terren communal daventa Vigeli Berther deputau. Leu ha el dau il stausch decisiv per la via da Cavorgia, ei s'engaschaus zun fetg per il stradun Mustér-Sedrun e per las tariffas da transport d'autos cun la viafier sur il Cuolm d'Ursera.

Vigeli Berther ha ussa bandunau nus per adina. Nus admettein in cordial Dieus paghi al defunct per sia vasta activitat professiunala e politica. Alla preziada consorta, als fegls ed allas famiglias en malencurada exprimin nus sincera condolentscha. Al prezau defunct Vigeli detti Dieus la pagaglia perpetna. El rauassi en pasch!

Leci Jacomet

En pia memoria da

GR 30.10.87

Vigeli Berther-Jacomet, Camischolas

La redacciun dalla Gasetta Romontscha ha fatg valer il di da sia mort, ils 14 d'october 1987. Ella presentaziun dalla historia da Tujetsch ein ils dus giubilars, Theophil Schmid e Vigeli Berther-Jacomet, stai entretschai e quei sco duas persunalitads da gronda pertada duront ils davos decennis. E cura che tut era mess giu e pinau, ei la mort dada denteren ed ha fatg in smac. Che negin ditgi ch'ella seigi ina «hoffia», la mort. Ed uss tucca ei da tener in ord l'auter. Tgei auter che turnar a rimnar, dumbrar ensemens e metter or da finiastra, sco ins metteva da lezzas uras ora alv. Ed ils merets dil defunct Vigeli Berther-Jacomet ein tutpresents eifer ed ordeifer la val.

Tut tgi ch'ei ius cun el a pèr sto schar valer. En scola eis el staus in prima musader e pratics surtut. Adina puspei danovamein ha el mussau vi sin la veta pratica e fatg resortir la nizevladad pil di da damaun. Vigeli Berther ei sez staus in quintist numero in, a tgau oravontut e quei dun ha el dau vinavon. Sia instrucziun manuala ei stada ferma e solida. In maun habel e neu dil lenn ha el fatg entagls da num. Quellas bialas caussas ch'el ha fatg en scola; dil reminent – il plantschii su e las sutgas a casia ein mussaments scosauda.

E ch'ins ha buca saviu rentar in um cun tals duns vid las quater preits, gliez per cass stat bein siper la detta. Cun siu talent per reglaments ed uordens pil beinstar dalla cumionza. Ils batlinis mess or da finiastra dattan perdetga. Leschas e regulativs che la vischnaunca ha decretau lezs onns e silsuenter – ils ezs ha el fatg, silmeins per gronda part. E quei ch'el veva giu inaga sinta maun, saveva il Vigeli Berther ordadora, sco quasi negin. Ha in u l'auter dils vischins magari vuliu saver meglier ch'el – u schizun se metter encounter, lu ha el saviu sesglatir e far gliez blut nuaus. Igl ei è da conceder; Vigeli Berther ha buca tschercau ils uffecis; ha el denton giu quei, u tschei enta maun, ha el teniu ferm ed ha fatg diever. Silsuenter ha el stuiu sentir sco mo paucs il gust dultschamar dalla pussonza.

En aquella ch'el – in vischin da tonta publicidad – ha sentiu ch'el vegni dil meins e che siu plaid veva breigia osum la bucca, ha el aunc tscheu e leu fatg valer sia preschientscha. Magari cun plails forzs, in tec forsa è per cumbatter sia persuladad. Ch'ins capeschi il Vigeli Berther-Jacomet en quellas uras malmaneivlas – e seigi surtut indulgents.



Ils funerals

Ina baselgiada sco mo darar, cura ch'ins ei vegnius cul defunct Vigeli Berther en baselgia. Schizun ils altars laterals e tocca envi sin quel dil sogn rusari han ils tschupials tonsch; entiras retschas da flurs, da tuttas uisas ch'igl atun bunta deivel ha fatg amogna. Aunc sch'ei va tut agradora, aschidadir giudapeis ad ina bara ei in mument singular e la freidezia dallas plattas veggad ault. Negin che concedess, malgrad ch'il temps da spetga ei ina misla penibla. Per in e scandin – era per quels ch'ei va tier il pauc. L'orgla e las vuschs che veggan en surdina giud la lautga mitigheschian per la letga. Ensemblamein cun ils chorus (il chor da baselgia ed il chor mischedau; il defunct ei staus commember d'honor dil cant da baselgia) ei il riug sefatgs, il riug dil plevon Giusep Cathomas. El cùn sia yusch che trembla buc, el ha cavigliau ils plaids cun adatg e tuts perdertamein.

Che la mort seigi vegnida en siu zugl culs gratulants e sepassada si da detschiert. El sappi maneivel sminar ses plaids, ils plaids dalla mort, lezza damaun allas sis e mesa, ils quitordisch d'october, pil di da ses sissontatschun onns. E sur Giuseppe Cathomas cuntinuescha culs plaids che la mort vegni a ver detg:

– Empau ei empau, Vigeli. Neu, tiuu ardiment da batter ei staus gronds, ti cun tes

mauns habels, ti has contonschiu quei che mo paucs contonschan. Luvrau che ti has il tgau giud la persuna pil beinstar dalla cumionza. Nies Bab vegg a schar suenter, sche ti has tratg meinsvart tut ils registers e la musica ei stada dad ault. E pigl auter tuni ei sco ord ina bucca, cheu ed autorra: quei hagi il Vigeli fatg, quei vein nus d'engraziar al president e depautau Vigeli Berther. Dat ei pia in meglier testament? Plaids tondanavon da cor, ha el detg, il plevon dil liug ed oragiu els bauns han ins enina pudi si cul flad. Ed il president communal Gion Beer ha retenuu semegliontamein igl andament dalla veta dil defunct, tut senza zuppen tar vi enzatgei e tuttina mess ora ed ulivau tondanavon bein. Il Gion Beer cun ses plaids sut vusch e tuts detg schi tempradamein.

L'aura en baselgia da sogn Vigeli a Sedrun ei vegnida silmeins tievgia. Aschidadir ch'era la consorta dil defunct, la Tresa Berther-Jacomet e ses treis feglis: Ivo, Placi ed Arno, han alzau ils egls. Els tuts vessen saviu duvrar il consort e bab. Il patratg denton ch'el hagi fatg il siu a casa ed ordeifer, enamiez la cumionza, ei in confiert che metta d'ina vart in bien ton. Alla zun prezziada e cara famiglialein nus tuts dar omisdus mauns ed empermetter da tener il Vigeli en bona memoria.

Vic Hendry



† Vigeli Berther, Sedrun

(gc) Ella GR dad oz leva Vic Hendry era gratular – integraru ella sura contribuziun – a Vigeli Berther sils 65. Duront che nus eran vid preparar la publicaziun – arriva la tresta nova che scolast secundar, anteriu president communal e deputau Vigeli Berther seigi morts. Nus savevan che ei mava buca bein cun el, denton ch'el fagessi aschi spert, sminavan ins tuttina buca. El ei morts ils 14 d.q., gest quei di che el cumpleneva ils 65. Igl artechel da gratulaziun cun la enumeraziun da sia gronda prestazion pil generalesser fuss consequentamein daventaus in necrolog. Lez suonda. Sincera condolentscha alla preziada famiglia en malencurada. La sepultura ha liug oz a Sedrun

GR 16.10.87

Activitat politica

- promoviu il sport da skis, la ginnastica, il giug da ballapei ed il bogn da senudar
- president dalla Uniun da cura e traffic
- president dallas corporaziuns d'aua (sogn Gions e Surrein)
- 1971/1981 president communal
- 1981/1983 suppleant dalla dertgira circuitala
- 1981/1983 deputau dalla Cadi
- 1985/1987 deputau dalla Cadi
- 1986/1987 president dil cussegli da vischnaunca

Siu andament

- naschiu ils 14-10-1922, sco 10avel affon da mistral Vigeli Berther-Flury a Camischolas
- scolas dil liug
- 1938-1944 seminari da scolasts a Cuera
- 1944/45 scolast a Caviggia
- 1945/46 dau scola a Selva, denteinen il studi da scolast secundar a Friburg e fatg lungatg a Paris e Peruggia
- 1947/49 scolast secundar a Lumbrein
- 1949/85 scola secundara a Camischolas, Rueras e Sedrun
- temps da stad substitut ella Bassa, emploiau dalla Viasier Retica e survigilader tier l'Ovra electrica Rein Anterior
- 1957 maridaus cun Tresa Jacomet e secasaus a Camischolas; treis buobs: Ivo, Placi e Arno
- hobbis: cristallas ed entagls en lenn
- morts ils 14-10-1987, era sco 10avel affon dalla famiglia

Acziuns principales duront sia presidenza: 1971–1981

- 1971 revediu la lescha da taglia ed introduciu la taglia sin schischom
- 1972 emancipaziun dalla femna, protecziun digl ambient e zavrau ils territoris d'utilizaziun, uorden da baghegiar, bloccada da baghegiar dils onns 1971–1975, prolungiu il temps da scola sin 40 jamnas
- 1973 constituziun da visch-naunca, decidiu da baghegiar la Tgësa communal, decisiun da baghegiar ils differents baghetgs da schurmetg, civil (publics e collectivs)
- 1974 spartiu la pleiv dalla visch-naunca politica
- 1975 acceptau la planisaziun locala ed igl uorden da baghegiar, suenter che l'emprema votaziun era ida dalla aua giu, plontaziun Scantschala
- 1976 engrondaziun dalla casa sogn Vigeli
- 1977 canalisaziun da visch-naunca, decisiun dalla casa sin cadruvi, miedi stabel en visch-naunca da Tujetsch,
- 1978 acceptau la contribuziun e las taxas da diever via a Maighels
- 1979 ovra electrica Val Giuv
- 1980 dismessa da rumians ensemblein cun la Corporaziun da visch-nauncas Surselva
- 1981 scamond d'acquist per persunas digl exterior, decidiu serenera